

BOSNA I HERCEGOVINA

Konkurencijsko vijeće



БОСНА И ХЕРЦЕГОВИНА

Конкуренијски савјет

Rješenje

**po Prijavi namjere koncentracije privrednog subjekta Farex d.o.o. Tešanj, Titova bb,
74264 Jelah, koja se odnosi na sticanje kontrole nad privrednim subjektom
Hercegovina auto d.d. Mostar, Bišće polje bb, 88000 Mostar kupovinom većinskog
paketa dionica**

**Sarajevo
decembar, 2025. godine**



Broj: UP-03-26-1-038-12/25

Sarajevo, 29.12.2025. godine

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (1) tačka d), a u vezi sa članovima 12., 13., 14., 16., 17. i 18. Zakona o konkurenciji („Službeni glasnik BiH“, br. 48/05, 76/07 i 80/09), rješavajući po Prijavi namjere koncentracije privrednog subjekta Farex d.o.o. Tešanj, Titova bb, 74264 Jelah podnesenoj putem punomoćnika advokata Kruško Elvira, iz Tešnja zaprimljenoj dana 17.10.2025. godine pod brojem: UP-03-26-1-038-1/25 na 38. (tridesetosmoj) sjednici održanoj dana 29.12.2025. godine, donijelo je

RJEŠENJE

1. Ocjenjuje se dopuštenom koncentracija na tržištu prodaje automobila i vozila lake kategorije na teritoriji Bosne i Hercegovine koja nastaje sticanjem kontrole privrednog subjekta Farex nad privrednim subjektom Hercegovina auto, kupovinom većinskog paketa dionica u smislu člana 12. stav 1. tačka b. pod 1) Zakona o konkurenciji.
2. Utvrđuje se da privredni subjekt Farex nije podnio Prijavu koncentracije u zakonom predviđenom roku, u smislu člana 16. stav (1) Zakona o konkurenciji.
3. Zbog povrede Zakona o konkurenciji navedenoj u tački 2. dispozitiva Rješenja, izriče se novčana kazna privrednom subjektu Farex u iznosu od 17.686,44 KM (sedamaesthiljadašeststotinaosamdeset šest i 1/44 konvertibilnih maraka), koju je dužan platiti u roku od 8 dana od prijema ovog Rješenja. U slučaju da se izrečena novčana kazna ne uplati u navedenom roku ista će biti naplaćena prinudnim putem uz obračunatu zateznu kamatu za vrijeme prekoračenja roka, prema važećim propisima Bosne i Hercegovine.
4. Obavezuje se Podnosilac prijave, privredni subjekt Farex da uplati administrativnu taksu u ukupnom iznosu od 5.000,00 KM (pet hiljada konvertibilnih maraka) u korist Budžeta institucija Bosne i Hercegovine.
5. Ovo Rješenje o koncentraciji upisuje se u Registar koncentracija.
6. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

Obrazloženje

Konkurencijsko vijeće je dana 17.10.2025. godine zaprimilo podnesak koji se odnosi na Prijavu namjere koncentracije privrednog subjekta Farex d.o.o. Tešanj, Titova bb, 74264 Jelah (poslana preporučeno putem pošte dana 16.10.2025. godine) koja se odnosi na sticanje kontrole nad privrednim subjektom Hercegovina auto d.d. Mostar, Bišće polje bb, 88000 Mostar kupovinom većinskog paketa dionica u smislu člana 12. stav 1. tačka b. pod 1) Zakona o konkurenciji („Službeni glasnik BiH“, br. 48/05, 76/07 i 80/09) (u daljem tekstu: Zakon).

S obzirom da Prijava nije bila kompletna, Konkurencijsko vijeće je aktom broj: UP-03-26-1-038-2/25 od dana 27.10.2025. godine, zatražilo dopunu iste.

Podnosilac prijave je aktom zaprimljenim pod brojem: UP-03-26-1-038-3/25 od dana 07.11.2025. godine dostavio traženu dopunu.

Podnosilac prijave je na traženje pojašnjenja od strane Konkurencijskog vijeća (akt broj: UP-03-26-1-038-4/25 od 17.11.2025. godine) dostavio informaciju zaprimljenu pod brojem: UP-03-26-1-038-5/25 dana 26.11.2025. godine, kao i informaciju broj: UP-03-26-1-038-8/25 dana 15.12.2025. godine.

Konkurencijsko vijeće je u skladu sa članom 16. stav 4. Zakona, izdalo Obavještenje o dostavljenoj Prijavi broj: UP-03-26-1-038-7/25 od 03.12.2025. godine, objavljeno u dnevnim novinama Dnevni list i web stranici Konkurencijskog vijeća (<https://bihkonk.gov.ba/>), te tom prilikom pozvalo sve zainteresovane strane na dostavljanje pisanih komentara o provođenju koncentracije.

Na izdato Obavještenje Konkurencijsko vijeće nije zaprimilo niti jedno očitovanje/ komentar.

Nakon kompletiranja Prijave, Konkurencijsko vijeće je izdalo Potvrdu o prijemu kompletne i uredne Prijave, u smislu člana 30. stav 3. Zakona, dana 29.12.2025. godine aktom broj: UP-03-26-1-038-10/25.

Podnosilac Prijave je naveo da zahtjev za ocjenu namjeravane koncentracije nije podnesen niti jednom drugom nadležnom organu izvan teritorije Bosne i Hercegovine, niti postoji namjera podnošenja takve prijave u smislu člana 30. stav 2. Zakona.

Uvidom u podnesenu Prijavu, Konkurencijsko vijeće je utvrdilo sljedeće:

Prijava nije podnesena u propisanom roku u smislu člana 16. stav (1) Zakona.

Administrativna taksa je uplaćena.

1. Učesnici koncentracije

Učesnici predmetne koncentracije su privredni subjekt Farex d.o.o. Tešanj, Titova bb, 74264 Jelah kao Podnosilac prijave i Hercegovina auto d.d. Mostar, Bišće polje bb, 88000 Mostar kao Ciljno društvo.

1.1. Privredni subjekt Farex d.o.o. Tešanj, Titova bb, 74264 Jelah – Farex

Privredni subjekt Farex d.o.o. Društvo za trgovinu, proizvodnju, promet i usluge, Tešanj, Titova bb, 74264 Jelah (u daljem tekstu: Podnosilac prijave ili Farex) je upisan u sudski registar pri Općinskom sudu u Zenici pod matičnim brojem:43-01-0008-12 i u 100% je vlasništvu fizičkog lica Kadušić Fahrudina.

Pretežna registovana djelatnost privrednog subjekta Farex je trgovina na veliko i malo robama široke potrošnje (hrana, piće, proizvodi za domaćinstvo i nespecijalizirana trgovina na veliko).

Povezana društva privrednog subjekta Farex i fizičkog lica Fahrudina Kadušića u Bosni i Hercegovini su:

- privredni subjekat **Farex nekretnine** d.o.o. Tešanj, Titova bb, 74264 Jelah je upisan u sudski registar pri Općinskom sudu u Zenici pod matičnim brojem: 43-01-0595-18 i u 100% je vlasništvu fizičkog lica Kadušić Fahrudina. Pretežna registrovana djelatnost je iznajmljivanje i upravljanje vlastitim nekretninama uzetim u zakup;
- privredni subjekat **Inpokomerc** a.d. Bugojno, Čaušlije bb, 70230 Bugojno je upisan u sudski registar pri Općinskom sudu u Travniku pod matičnim brojem: 51-02-0006-08 u kojem privredni subjekat Farex posjeduje 95,2678% dionica sa pravom glasa. Pretežna registrovana djelatnost je iznajmljivanje i upravljanje vlastitim nekretninama uzetim u zakup;
- privredni subjekat **Bugojnopromet** a.d. Bugojno, Dr. Wagner 11, 70230 Bugojno je upisan u sudski registar pri Općinskom sudu u Travniku pod matičnim brojem: 51-02-0007-08 u kojem privredni subjekat Farex posjeduje 67,7348% dionica sa pravom glasa. Pretežna registrovana djelatnost je iznajmljivanje i upravljanje vlastitim nekretninama uzetim u zakup;
- privredni subjekat **Fenso** d.o.o. Ciglana 27, Tešanj, 74264 Jelah je upisan u sudski registar pri Općinskom sudu u Zenici pod matičnim brojem: 43-01-0336-23 i u 50% je vlasništvu fizičkog lica Kadušić Mirzada (koji je u krvnom srodstvu sa Kadušić Fahrudinom – otac-sin-posredno upravljanje). Pretežna registrovana djelatnost je proizvodnja proizvoda od plastičnih masa za građevinarstvo.

1.2. Privredni subjekt Hercegovina auto d.d. Mostar, Bišće polje bb, 88000 Mostar Ciljno društvo

Privredni subjekt Hercegovina auto d.d. Mostar, Bišće polje bb, 88000 Mostar registrovano je u sudskom registru pri Općinskom sudu u Mostaru pod matičnim brojem 1-10778 (u daljem tekstu: Hercegovina auto ili Ciljno društvo).

Privredni subjekat Hercegovina auto je u vlasništvu više dioničara prema Listi dioničara, a najveći dioničari su privredni subjekti Farex sa 49,821% učešća, ASA Banka d.d. Sarajevo sa 24,915% i ZIF „Bonus“ d.d. Sarajevo sa 16,731%, te mali dioničari.

Osnovna registrovana poslovna djelatnost privrednog subjekta Hercegovina auto d.d. Mostar je trgovina automobilima i vozilima lake kategorije (šifra djelatnosti 45.11.)

Privredni subjekat Hercegovina auto nema povezanih niti zavisnih društava.

2. Pravni okvir ocjene koncentracije

Konkurencijsko vijeće u provođenju postupka ocjene dopuštenosti koncentracije primijenilo je odredbe Zakona o konkurenciji („Službeni glasnik BiH“, br. 48/05, 76/07 i 80/09), Odluke o utvrđivanju relevantnog tržišta („Službeni glasnik BiH“, broj 18/06 i 34/10), Odluke o definisanju kategorija dominantnog položaja („Službeni glasnik BiH“, broj 34/10) te Odluke o načinu podnošenja prijave i kriterija za ocjenu koncentracija privrednih subjekata („Službeni glasnik BiH“, broj 34/10).

3. Pravni osnov predmetne transakcije

Predmetna koncentracija odnosi se na sticanje kontrole privrednog subjekta Farex nad privrednim subjektom Hercegovina auto kupovinom većinskog paketa dionica.

Kao pravni osnov predmetne transakcije je dostavljena sljedeća dokumentacija:

- Zahtjev za odobravanje objavljivanje tender ponude za preuzimanje dioničarskog društva Hercegovina auto od 29.01.2024 godine;
- Ponuda za preuzimanje dioničarskog društva od strane Farex za dionice društva Hercegovina auto od 04.06.2025. godine;
- Rješenje Komisije za vrijednosne papire Federacije Bosne i Hercegovine broj: 04/4-19-21/24 od 30.07.2025. godine;
- Obavještenje u vezi ponude za preuzimanje Hercegovina auto objavljene u dnevnim novinama: Dnevni list i Dnevni avaz, dana 06.08.2025. godine zajedno sa Ponudom za preuzimanje dioničarskog društva Hercegovina auto od 05.08.2025. godine (kao i na veb stranici Sarajevske berze <https://www.sase.ba/>);
- Izvještaj o preuzimanju iz Registra za vrijednosne papire Federacije Bosne i Hercegovine od 08.09.2025. godine broj: 02-7- 6455/25;
- Obavijest iz Registra za vrijednosne papire Federacije Bosne i Hercegovine od 16.09.2025. godine broj: 02-7-6637/25;
- Potvrda o stanju na računu iz Registra za vrijednosne papire Federacije Bosne i Hercegovine broj:02-7818/25 od 03.11.2025. godine.

Pravni osnov koncentracije predstavlja Obavještenje u vezi ponude za preuzimanje Hercegovina auto zajedno sa Ponudom za preuzimanje dioničarskog društva Heregovina auto objavljene u dnevnim novinama dana 06.08.2025. godine (istog dana objavljeno i na stranici Sarajevske berze), koja je donesena u skladu sa Zakonom o preuzimanju dioničkih društava („Službene novine Federacije BiH“, br. 77/15) i Rješenjem Komisije za vrijednosne papire Federacije Bosne i Hercegovine broj: 04/4-19-21/24 od 30.07.2025. godine.

Na datum odobravanja ponude, privredni subjekat Farex je imao 49,8214% od ukupnog broja dionica odnosno 328.400 redovnih dionica od ukupno emitovanih u ciljnom društvu.

Rok važenja ponude za preuzimanje je bio 28 dana od dana objavljivanja ponude u novinama.

Tokom trajanja ponude, vlasnici dionica su imali priliku da deponuju svoje dionice i prodaju ih privrednom subjektu Farex. Ponuda se odnosila na 330.755 dionica ili 50,1786 % dionica od ukupnog broja emitiranih dionica.

Prema Izvještaju o preuzimanju iz Registra za vrijednosne papire Federacije Bosne i Hercegovine od 08.09.2025. godine broj: 02-7-6455/25 objavljenu ponudu je prihvatilo 4 (četiri) lica u ukupnoj količini od 1801 dionicu što predstavlja 0,2732% dionica (sa pravom glasa), čime nakon okončane ponude privredni subjekat Farex ima 50,0946% ili 330.201 dionicu od ukupno emitovanih dionica Hercegovina auto.

Registar vrijednosnih papira Federacije Bosne i Hercegovine je aktom broj: 02-7-6637/25 od 16.09.2025. godine obavijestio privrednog subjekta Farex da je izvršen prenos 1801 dionice koje su bile deponovane u postupku preuzimanja društva Hercegovina auto na ponudioca - privredni subjekt Farex, što je dokumentovano i potvrdom o stanju na računu kod istog registra.

Slijedom navedenog, predmetna koncentracija predstavlja sticanje neposredne kontrole privrednog subjekta Farex nad privrednim subjektom Hercegovina auto u smislu člana 12. stav 1. tačka b. pod 1) Zakona.

4. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/ usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne osobine, kvalitet, uobičajenu namjenu, način upotrebe, uslove prodaje i cijene.

Nadalje prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Podnosilac prijave s obzirom na registrovanu djelatnost Ciljnog društva - trgovina automobilima i vozilima lake kategorije, predlaže da relevantno tržište u proizvodnom smislu bude definisano kao tržište automobilima i vozilima lake kategorije, prilikom čega se navodi da Podnosilac prijave nije prisutan na navedenom tržištu, odnosno nema preklapanja djelatnosti.

Kao relevantno tržište u geografskom smislu, utvrđuje se teritorij Bosne i Hercegovine, s obzirom da na istom djeluju glavni konkurenti Ciljnog društva kao i činjenica da su kupci navedenih proizvoda iz cijele Bosne i Hercegovine.

Slijedom iznesenog relevantno tržište predmetne koncentracije je tržište prodaje automobila i vozila lake kategorije u Bosni i Hercegovini.

5. Obaveza prijave koncentracije

Obaveza prijave koncentracije privrednih subjekata sa sjedištem u Bosni i Hercegovini, u smislu člana 14. stav (1) pod b) Zakona, u vezi sa članom 2. Odluke o načinu podnošenja prijave i kriterijima za ocjenu koncentracije privrednih subjekata, postoji ako ukupni godišnji prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,00%.

Prema podacima iz Prijave, ukupni godišnji prihodi privrednih subjekata učesnika koncentracije (i njihovih povezanih privrednih subjekata), na dan 31. decembar 2024. godine, kao godini koja prethodi koncentraciji, iznosi:

Tabela 1. Ukupni godišnji prihodi učesnika koncentracije

	Farex*	Hercegovina auto
	KM	KM
Svijet	(..) ¹	(..)
BiH	(..)	(..)

Izvor: Podaci iz Prijave o namjeri koncentracije

* u okviru ostvarenih prihoda privrednog subjekta Farex sadržani su prihodi njegovih povezanih društava i to: Inpokomerc a.d. Bugojno – (..), Bugojnopromet a.d. Bugojno – (..), Fenso d.o.o. Tešanj – (..)

Godišnji prihodi učesnika koncentracije predstavljaju ukupne prihode (bez poreza na dodatnu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekta.

Prema navedenim podacima, učesnici koncentracije ispunjavaju uslov pojedinačnog ukupnog godišnjeg prihoda svakog učesnika u koncentraciji ostvarenog na tržištu Bosne i Hercegovine, koji treba da iznosi najmanje 8.000.000 KM u smislu člana 14. stav (1) tačka b) Zakona (Tabela 1.), te su bili u obavezi podnijeti Prijavu koncentracije.

5.1. Udjeli učesnika namjeravane koncentracije i njihovih konkurenata na relevantnom tržištu

Tabela 2. Prikaz udjela tržišnih konkurenata na relevantnom tržištu u 2024 godini

R.br.	Naziv privrednog subjekta	Ostvareni prihod (KM)	Tržišno učešće (%)
1.	(..)	(..)	(..)
2.	(..)	(..)	(..)
3.	(..)	(..)	(..)
4.	(..)	(..)	(..)
5.	(..)	(..)	(..)
6.	(..)	(..)	(..)
7.	(..)	(..)	(..)
8.	(..)	(..)	(..)
9.	(..)	(..)	(..)
10.	(..)	(..)	(..)
11.	(..)	(..)	(..)
12.	(..)	(..)	(..)
13.	(..)	(..)	(..)
14.	(..)	(..)	(..)
15.	(..)	(..)	(..)
16.	(..)	(..)	(..)
17.	(..)	(..)	(..)
18.	(..)	(..)	(..)
19.	(..)	(..)	(..)
20.	(..)	(..)	(..)
21.	(..)	(..)	(..)

¹ Podaci predstavljaju poslovnu tajnu u smislu člana 38. Zakona o konkurenciji

	Ukupno	1.011.234.185,00	100,00
--	---------------	-------------------------	---------------

Izvor podataka: podaci o ostvarenim prihodima su uzeti sa web stranice Companywall.

Analizom dostavljenih podataka (Tabela 2.) i procjenom namjeravane koncentracije u smislu člana 17. Zakona, neće doći do promjene tržišne strukture s obzirom da Podnosilac prijave nije prisutan na relevantnom tržištu, dok je Hercegovina auto kao Ciljno društvo prisutno sa 1,514% na istom.

Hercegovina auto jedan je od distributera u distributivnoj mreži automobila Škoda u Bosni i Hercegovini, te osim njega distribuciju navedenih vozila vrše sljedeći privredni subjekti: (..).

Podnosilac prijave je u vezi navedenog dostavio i podatak da je na teritoriji Bosne i Hercegovine u 2024 godini prodato 2.245 novih automobila iz programa Škoda, dok je Hercegovina auto prodala 170 vozila od navedenog broja što predstavlja 7,5% od prodatih Škoda vozila u BiH, te kao i drugi distributeri vrše usluge maloprodaje, veleprodaje i usluge servisa. Nerijetko vrše i otkup starih vozila i vrše zamjenu „staro za novo“ pri čemu uzimaju i polovna vozila drugih proizvođača.

Prema navedenim podacima (Tabela 2), učesnici koncentracije nisu ispunili uslov iz člana 14. stav 1. tačka b) u pogledu tržišnog udjela s obzirom da privredni subjekat Farex nije učesnik na relevantnom tržištu, dok je Ciljno društvo ostvarilo procenat od 1,514% na istom, te navedenom transakcijom neće doći do strukturalne promjene na relevantnom tržištu.

6. Ocjena koncentracije

Konkurencijsko vijeće je zaključilo, u skladu sa članom 17. Zakona o konkurenciji, da se provođenjem predmetne koncentracije ne sprječava, ne ograničava niti narušava tržišna konkurencija na relevantnom tržištu prodaje automobila i vozila lake kategorije u Bosni i Hercegovini, budući da navedena koncentracija neće proizvesti promjenu tržišnih pozicija učesnika na tržištu. Učesnici koncentracije ni prije ni nakon transakcije ne ostvaruju tržišne udjele koji bi ukazivali na stvaranje ili jačanje dominantnog položaja.

Detaljnou analizom poslovnih aktivnosti, tržišnih udjela, asortimana proizvoda te strukture ponude i potražnje utvrđeno je da predmetna koncentracija nema kapacitet da ograniči pristup tržištu drugim učesnicima. Tržište karakteriše prisustvo većeg broja aktivnih konkurenata, uključujući ovlaštene distributere, autosalone i prodajne lance koji raspolažu značajnim tržišnim kapacitetima, čime se obezbjeđuje stabilan stepen konkurentskog pritiska.

Također, Podnosilac prijave nije prisutan na tržištu Ciljnog društva označenim kao relevantnim tržištem na teritoriji Bosne i Hercegovine, stoga nema ni horizontalnog preklapanja među učesnicima koncentracije koja bi mogla dovesti do poremećaja u strukturi tržišta ili do zatvaranja tržišta postojećim i potencijalnim konkurentima.

Imajući u vidu sve prethodno navedeno, Konkurencijsko vijeće smatra da predmetna koncentracija ispunjava zakonske kriterije za odobrenje te da njeno provođenje neće imati za posljedicu narušavanje efektivne tržišne konkurencije u smislu Zakona o konkurenciji.

Na osnovu utvrđenih činjenica i dostavljenih podataka, Konkurencijsko vijeće je ocijenilo koncentraciju dopuštenom, u smislu člana 18. stav (2) tačka a) Zakona o konkurenciji, te je odlučilo kao u tački 1. dispozitiva ovog rješenja.

7. Novčana kazna

Konkurencijsko vijeće je ocijenilo da predmetna koncentracija predstavlja koncentraciju u smislu člana 12. stav 1. tačka b) pod 1) Zakona, te da je obaveza prijave koncentracije u smislu člana 14. stav 1. tačka b) Zakona postojala za privredni subjekt Farex.

Konkurencijsko vijeće, u smislu člana 49. stav 1. tačka b) Zakona o konkurenciji, može izreći novčanu kaznu do 1,0% od ukupnog prihoda u prethodnoj godini poslovanja radi neprijavlivanja koncentracije, u smislu člana 16. stav 1. Zakona o konkurenciji.

Stoga je privredni subjekt Farex bio dužan podnijeti prijavu koncentracije, u smislu člana 16. Zakona, u roku od petnaest dana od dana zaključivanja sporazuma, objavljivanja javne ponude dionica ili sticanje kontrole, zavisno šta nastupi ranije.

Budući da je Obavještenje u vezi ponude za preuzimanje Hercegovina auto zajedno sa Ponudom za preuzimanje dioničarskog društva Hercegovina auto objavljeno u dnevnim novinama dana 06.08.2025. godine (kao i na Sarajevskoj berzi), a Prijava podnesena dana 16.10.2025. godine, Konkurencijsko vijeće je utvrdilo da nije ispoštovana navedena odredba Zakona koja se odnosila na vremenski rok za podnošenje prijave.

Članom 18. stav 9. Zakona propisano je da se koncentracija neće moći sprovesti prije donošenja rješenja kojim se potvrđuje usklađenost predmetne koncentracije iz člana 12. i 14. ovog Zakona, dok je stavom 10. propisano da odredbe stava 9. ovog člana ne sprječava aktivnosti sticanja kontrole nad privrednim subjektima regulisane drugim propisima.

Konkurencijsko vijeće je u smislu člana 52. Zakona prilikom određivanja visine novčane kazne uvažilo sve olakšavajuće i objektivne okolnosti i utvrdilo da su navedenom koncentracijom povrijeđene zakonske obaveze propisane članom 16. stav 1. Zakona te shodno tome odlučilo kao u tački 2. dispozitiva Rješenja.

Konkurencijsko vijeće je prilikom određivanja visine novčane kazne uzelo u obzir sljedeće olakšavajuće okolnosti:

- da je Podnosilac prijave podnio predmetnu Prijavu,
- da je u postupku ocjene koncentracije sarađivao i u ostavljenim rokovima dostavljao svu traženu relevantnu dokumentaciju i podatke,
- da koncentracija nije izazvala narušavanje relevantnog tržišta,
- da je Registar vrijednosnih papira Federacije Bosne i Hercegovine aktom broj: 02-7-6637/25 od 16.09.2025. godine obavijestio privredni subjekt Farex da je izvršen prenos 1801 dionice koje su bile deponovane u postupku preuzimanja društva Hercegovina auto na ponudioca privrednog subjekta Farex, što je dokumentovano i potvrdom o stanju na računu kod istog registra. Evidencija vlasništva dionica se ne vodi u sudskom registru te se sve promjene dokumentuju kod Registra vrijednosnih papira FBiH,
- da nakon završene ponude za preuzimanje privredni subjekat Farex nije vršio nikakve promjene koje se odnose na upravljanje društvom, niti preduzimao radnje upravljanja koje se mogu smatrati promjenom strateških odluka, reorganizacijom ili promjenom poslovne politike privrednog subjekta Hercegovina auto,

Na osnovu navedenog, Konkurencijsko vijeće je izreklo ukupnu novčanu kaznu radi kršenja člana 16. stav 1. Zakona o konkurenciji privrednom subjektu Farex u visini od 17.686,44 KM što predstavlja (..) ukupnog prihoda ostvarenog u 2024 godini koji je iznosio (..) kako je navedeno u tački 3. ovog Rješenja.

U slučaju da privredni subjekat Farex ne izvrši uplatu novčane kazne u utvrđenom roku, Konkurencijsko vijeće će zatražiti od relevantnih tijela prinudno izvršenje istih, te obračunati zateznu kamatu za vrijeme prekoračenja roka uplate novčane kazne, u skladu sa propisima Bosne i Hercegovine.

Konkurencijsko vijeće je slijedom navedenog odlučilo kao u tački 2. i 3. dispozitiva ovog Rješenja.

8. Administrativna taksa

Podnosilac Prijave na ovo Rješenje, u skladu sa članom 2. Tarifni broj 107. tačka d) podtačka 1. Odluke o visini administrativnih taksi u vezi s procesnim radnjama pred Konkurencijskim vijećem („Službeni glasnik BiH“, br. 30/06, 18/11 i 75/18) je dužan platiti administrativnu taksu u ukupnom iznosu od 5.000,00 KM u korist Budžeta institucija Bosne i Hercegovine.

U skladu sa odredbom člana 3. stav. 1. i stav 2. tačka b) Odluke o visini administrativnih taksi u vezi s procesnim radnjama pred Konkurencijskim vijećem, Podnosilac Prijave nakon izvršene uplate je dužan uplatnicu kao dokaz o izvršenoj uplati administrativne takse dostaviti Konkurencijskom vijeću, prije dostavljanja Rješenja.

Ukoliko Podnosilac Prijave ne izvrši uplatu administrativne takse, Konkurencijsko vijeće će pokrenuti postupak prinudne naplate po proceduri koja je propisana članom 18. Zakona o administrativnim taksama Bosne i Hercegovine („Službeni glasnik BiH“ broj: 16/02, 19/02, 43/04, 8/06, 76/06, 76/07 i 3/10).

Slijedom navedenog Konkurencijsko vijeće je odlučilo kao u tački 4. dispozitiva ovog Rješenja.

9. Pouka o pravnom lijeku

Ovo Rješenje je konačno i protiv istoga nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Rješenja.

Predsjednica

Ninela Salihbašić